

Ch: *Hööäuurhü!*

Ma: Mier sinn guhd beinandor.

ME: Gömmer so sahchn, ja?

Ma: Gannsde alles offschreihm, abdruggn...

ME: Awer was'sch ma geheerd hab, dess solls'sch ja umme Gerichd handln, dass sisch ä *Breisse* in eire Bänd eingeschlichn hadd. Iss dos wahr?

Ch: Ä wass?

Ma: Ä *Breisse*, hiehr.

ME: So ä *Breissn*sagg.

Ma: *Dieh Saue*.

Ch: Aah *näjaaa*.

ME: Alsou isch meene, deer soll ja dsiemlich innen Hindorgrund geruschd wordn sein, abor dennoch soll ja ausm *Brandnburgesch*n so ä Heini, so ä...

Ma: Moor muss ma sachn, es iss ä guhdmüdschor Mensch, heje.

ME: Drodsdehm. Drodsdehm.

Ch: Deer lernd schnell. He, deer lernd schnell. Grahde mid dor Schbrache unn so. Derr gommd schoun rann langsaahm.

ME: Gommder hinderhähr?

Ma: Isch meene, dass gibds ja nisch immor, dass *Breissn* *Saggsn* hälfn. Duh weesd ja, wies wahr.

ME: Merr schbrichd ja ooch immor von ä *niederischn Eigju* von de *Breissn*.

Ch: Dass gombensiern wier midd unsorm *ieberdurschsniddlischn Eigju*.

ME: Also das gönnder wiedor raushouln.

Ch: Alsou mier warn ja dahmaldischd in dor Brädullje.

ME: Wie warn dass eischndlich dahmald?

Ma: Dahmald, wo där *Breisse* gahm?

ME: Jaa, das däd uns mah indorressiern, unn unsre Lähsor. Es soll jah das Geruschd geehm, dass iehr frieher mal *uhrsäggssch* wahr. Alsou *wirrglische* Deudsche, meschd mor mah sachn. Iehr hadded ja diesn *Schdeffahn*, diesn *Douhmas*...

Ma: *Dohmser!*

ME: *Dommsieh*.

Ch: Na eischndlich hiesor jah immor *Loohdaar*, unsor *Loohdie*.

ME: Där soll ja dahmald iebergeloofn sein.

Ch: *Najaaa*, deer iss ja ooch nach *Brandnbuhrsch* abgehaun.

ME: Alsou, deer hadd eisch...

Ma: Deer hadd uns schmäählisch im Schdisch gelassn. Unn mier hamms nisch begriffn, wasser da vorrhadd.

ME: Habbder dass indswischn ieberwindn gönnen?

Ma: *Naja*, schwär. Schwärn Härdsns... Unn wänn wier uns sähn middem *Dommsier*, da missmer ooch voorheerds ersd immor souh finf Mienuhden mahl ne gleene Andachd haldn an seihn Gewissn.

Ch: Isch meene, ä bissl vormissn due'schn schohn,

isch meene, grade gemiedlich beim Bier, dah feehld dor schohn ä was.

ME: Isch orinnre misch ooch noch, dahmald, mier sinn ja alle mahl aus *Leibdssch* gägommn.

Ch: *Wuhhääääää*. Nu glahr!

ME: Das wahr ja dahmald, das missdmor villeih ä mahl firn Läsor sahchn, dahmald, da had dä Lufd gebrandn.

Ch: Das wahr ä hellor Gobb!

Ma: Där wahr waschächd!

ME: Grahde so, wenss Bludd ande Degge schbridsde, alsou isch sahche nuhr, dass...

Ch: *Hähäääääh!*

ME: *Hähä!* Jawoll! Da wahr ja dahmahls noch dor Bähr lous, dor Bähr nu nisch grade, ahbor dor *Leibsschor* *Leewe*.

Ch: Dor *Leewe*, heh.

ME: Da hadder gebrilld! Da hammer schohn gands scheen de Sauh rausgelassn.

Ch: Oh jah duuh.

ME: Iss das ä bissl andohrs gewordn, grade so heide beim Gondserde, hadsch dah so ä Eindrugg...

Ma: Duh mussd bedängn, mier hamm heide nuhr, oohdor fasd nuhr neies Maddrischaal geschbield.

ME: Das gloobsde doch sälbör nisch.

Ma: Das wahrn fuffdssch Brohdsend neies Maddriejschal, ooch, wenss andors glingd, heje, ahbor, ahbor, isch gann diehr das offdsähln, ahr das willsch jäds nisch machn, uns wahr einfach noch nisch sichor heje, wiehr sinn einfach ma aus dor volln Brohbe...

Ch: Weesde, wasde nisch vorgässn darfsd, mier sinn ja ooch alle n bisssschn äldor gäwordn. Dass wischdsch!

ME: Isch gloobe, dah mussmor diehr räsched gehm.

Ch: Mier sinn nisch mähr de Jingsden, heje, due.

ME: Die Jährä schreidn ja nisch daahdnloos an eenem vorrbele.

Ch: *Gor-regd*.

ME: Grade da hammer dä Frahe, ob dor Här Gummbräsched seihn Schdahduss als dorr *siesse* *Giddarisd* *esdlisch* dor *Bleihse* haldn gann.

Ch: *Dieh Saue duuuu!*

ME: Das wirde uns ähm noch indorressiern, obbor ooch noch leif haldn gann, wasser uff dor Bladde verrschbrichd.

Ma: Nuujahe, deer hadssch jäds sohnä *Gomm-bagdboggs* gegoofd... hiehr.

Ch: *Gomm-baggd!* *Schderscho* iss dieh!

Ma: *Schderjscho!*

ME: *Donnorlidschn!*

Ma: Unn dass mussor ainfach ersd ma begreifn lern, heje.

Ch: Isch meene, dor schnellsde wahrer nich im Gobbe, hee due.

Ma: Das wahrer noch nieh, heej!

ME: Isch gloobe ooch, dass iss fiern Muhsigger ooch nisch wichdsch, odor?

Ma: Haubdsache, dä Fingor driggn unn schlahn richdsch nein. Ahwor, wenne sich nischd mehrschn gann, hiehr in seim, in seinor, hiehr wie heesdes...

Ch: ... Gobbe...

ME: In seim Nischel...

Ch: ... Berne...

Ma: ... da werds brendlsch, ahwor, das gommd widdor, das gommd widdor. S wahr ä bissl viehl ferr iehn jeds so.

ME: S wahr in ledsder Dseld jah souhwiehsou ä bissl viehl ferr eisch, grad souh dieh Umschdellung währnd dor *Währungsunion*, im Vollgsmund ooch *Weh Uuh* genann.

Ma: Mier hamm geen Fennsch meehr!

Ch: *Dieh Schweine*, due, hiehr. Isch sahch diehr. Miehr hamm ä guhnd Schmödd gemachd, ä guhnd Gies, hä. Dah gomm dieh Vods, duuh, isch sahch diehr, duh grischd nuhr dä Hälfd. *Dieh Sägge!*

Ma: Soo, unn dieh andre Hälfd, dieh hammse eingedsoochn, heje souh.

Ch: *Ooark!*

ME: Wieh siehdsn da eischndlich mid eiern neien Brohdugd aus. Schdehder dahrdardsu?

Ma: Dä *Fiehre?*

ME: Dä *Fiehre*.

Ma: Ne, isch heere ma, uhmouu, ma heerdssch mah an...

Ch: *Nuuuuuhaaaouo...*

Ma: Unn dann sahcd mer, na guuhd.

Ch: Sohlang s Honnorahr schdimmd, he due.

ME: Na dass iss ja glahr. Mohr muss ja ooch von irschnd ä was lehm.

Ch: Wenss gnadder, wenss gnisderd inndor Fohde.

Ma: Mohr machd ja immor mah was mid, heje. Isch meene, frieher sinn mer ahrbeidn gegangn, jeds hammer ne Bladde gemachd, dass iss doch daselbe heje.

Ch: Isch muss ersdma schiffn gehn. Wouh issn das Gloh!

ME: Dass iss da ohhm!

Ch: *Öööoors!*

ME: Seehd iehr eisch eischndlich nohch als eehne *Off-graund-Bänd*, wasser jah vohr dor Wände ward?

Ma: *Off graund?* Isch gann gehn englsch du, eh!

ME: *Off* iss sohdsuhsahchn offm Grund, soh midm Fließn offm Bohden dor Dahdsachn schdehn.

Ma: Offseddrugger wahrsch. *Jah!*

ME: Wieh seehd iehr eisch selbor. Wieh deffieh-nierd iehr eisch?

Ma: Miehr machn Musigge hej. Unn, *nuuh-schahe*, dass iss einfach mah unsor Lehmsinhald